

屏廬葉邴

屏廬集

上

銅鼓書堂詞話

宛平查禮恂叔

宋人落梅詞名句甚夥如高陽臺一解賦落梅者吳夢
窗云宮粉雕痕仙雲墮影無人野水荒灣又云南樓不
恨吹橫笛恨曉風千里關山半飄零庭院黃昏月冷欄
杆李賀房云竹裏遮寒誰念減盡芳雲么鳳叫晚吹晴
雪料水空煙冷西冷又云環珮無聲草暗臺榭春深欲
倩怨笛傳清譜怕斷霞難返吟魂轉銷凝點點隨波望
極江亭李秋崖云門掩香殘屏搖夢冷珠鈿糝綴芳塵

又云蘚梢空挂淒涼月想鶴歸猶怨黃昏黯銷凝人老
天涯雁影沈沈又云煙涇荒村背春無限愁深迎風點
點飄寒粉悵秋娘滿裊啼痕三人寫落梅之情景魂魄
各有不同其雅正澹遠柔婉深長之處令人可思可詠
周弁陽蘆洲漁笛譜曲游春一調游西湖云漠漠香塵
隔沸十里亂絲叢笛看畫船盡入西泠閒卻半湖春色
其詞句雅奏之妙固不必言案武林舊事云都城自過
收鎧貴游巨室爭先出郊謂之探春水面畫楫櫓比如
鱗無行舟之路游之次第先南而後北至午則盡入西

冷橋裏湖其外幾無一舸矣弁陽老人有詞云看畫船
盡入西泠閒卻半湖春色蓋紀實也又馬臻霞外集有
春日游西湖詩云畫船過午入西泠人擁孤山陌上塵
應被弁陽摹寫盡晚來閒卻半湖春馬之贊美弁陽嘯
翁之詞可稱佳話

宋寶慶初史彌遠廢立之際錢塘書肆陳起宗之能詩
凡江湖詩人俱與之善刊江湖集以售劉潛夫南岳臺
與焉宗之賦詩有云秋雨梧桐皇子府春風楊柳相公
橋本改劉屏山句也或嫁秋雨春風之句爲敖器之所

作言者併梅詩論列劈江湖集版二人皆坐罪初彌遠
議下大理逮治鄭丞相清之在瑣闥白彌遠中輟而宗
之坐流配於是詔禁士大夫作詩如孫花翁之徒改業
爲長短句紹定癸巳彌遠死詩禁解劉潛夫爲訪梅絕
句云夢得因桃卻左遷長源爲柳忤當權幸然不識桃
竝李也被梅花累十年此可備梅花大公案也事見瀛
奎律髓注

蕭泰來字則陽號小山臨江人紹定二年進士著有
小山集癸辛雜識云泰來理宗朝爲御史附謝丞相爲右

司李伯玉所劾姚希得指爲小人之宗小山嘗有霜天
曉角詠梅云千霜萬雪受盡寒磨折賴是生來瘦硬渾
不怕角吹徹清絕影也別知心惟有月元沒春風性情
如何共海棠說命意措詞自覺不凡而於樂章風格亦
見雅俊較之徒事豔冶綺語者其身分高若干等第詞
家審之

宋丞相少保信國公文天祥留燕時題張許雙忠廟沁
園春云爲子死孝爲臣死忠死又何妨自光岳氣分土
無全節君臣義缺誰負堅腸罵賊睢陽愛君許遠留得

聲名萬古香後來者無二公之操百鍊之剛堪傷人易
云亡應烈烈轟轟做一場使當時賣國甘心降虜受人
唾辱安得流芳古廟陰森遺容嚴肅枯木寒鴉幾夕陽
郵亭下有姦雄過此仔細思量盥漱讀之公之忠義剛
正凜凜之氣勢流露於簡端者可耿日月薄雲霄雖辭
藻未免麤豪然忠臣孝子之作只可以氣概論未可以
字句求也

情有文不能達詩不能道者而獨於長短句中可以委
宛形容之如黃雪舟

孝邁

自度湘春夜月一解傷春云

可惜一片清歌都付與黃昏欲共柳花低訴怕柳花輕
薄不解傷春又云空樽夜泣青山不語殘月當門翠玉
樓前惟是有一陂湘水搖蕩湘雲又云這次第算人間
沒箇并刀翦斷心上愁痕又水龍吟暮春云店舍無煙
關山有月梨花滿地二十年好夢不曾圓合而今老都
休矣又云柔腸一寸七分是恨三分是淚又云待問春
怎把千紅換得一池綠水雪舟才思俊逸天分高超握
筆神來當有悟入處非積學所到也劉後村跋雪舟樂
章謂其清麗叔原方回不能加其綿密駸駸秦郎和天

也瘦之作後村可爲雪舟之知音

詞不同乎詩而後佳然詞不離乎詩方能雅昔沈義甫
評施梅川詞云梅川音律有源流故其聲無舛誤讀唐
詩多故語雅淡義甫斯言深得樂府之三昧者嘗憶梅
川有登吳山水龍吟云翠輦湧出滄溟影又云樓臺對
起欄杆重憑山川自古又云看天低四遠江空萬里登
臨處分吳楚又云兩岸花飛絮舞度春風滿城簫鼓英
雄暗老早潮晚汐歸帆過櫓淮水東流塞雲北渡夕陽
西去其聲韻辭華大雅不羣脫盡綺膩纖穠之態案武

林舊事云施梅川名岳字仲山梅川其號也吳人精於律呂其卒也楊守齋爲樹梅作亭薛梯颺爲誌其墓李質房書周草窗題蓋葬於西湖虎頭巖下

張安國

孝祥

號于湖烏江人紹興二十四年廷對第一

授承事郎簽書鎮東軍判官累遷中書舍人直學士院兼督府參贊軍事領建康留守尋以荆南湖北路安撫使進顯謨閣直學士致仕著有于湖詞一卷聲律宏邁音節振拔氣雄而調雅意緩而語峭集內念奴嬌過洞庭一解最爲世所稱頌其中如玉界瓊田三萬頃著我

扁舟一葉素月分輝明河共影表裏俱澄澈又云短鬢
蕭疏襟袞冷穩泛滄溟空闊盡吸西江細斟北斗萬象
爲賓客叩舷獨嘯不知今夕何夕此皆神來之句非思
議所能及也鶴山魏了翁跋于湖手書此詞眞蹟云張
于湖有英姿奇氣著之湖湘閒未爲不遇洞庭所賦在
集中最爲傑特方其吸江酌斗賓客萬象時詎知世閒
有紫微青瑣哉湯衡序紫微詞云于湖平昔爲詞未嘗
著橐筆酣興健揮灑滿幅頃刻卽成無一字無來處
能改齋漫錄載陳濟翁寄張于湖驀山溪詞云去年今

日從駕游西苑彩杖壓金波看水戲魚龍曼衍寶津南
殿宴坐近天顏金杯酒君王勸頭上宮花顫六軍錦繡
萬騎穿楊箭日暮翠華歸擁鈞天笙歌一片如今關外
千里未歸人前山雨西樓晚望斷思君眼舍人張孝祥
知潭州因宴客妓有韻此舊調者唱至金杯酒君王勸
頭上宮花顫其首自爲之搖動者數四坐客忍笑指目
者甚衆而張竟不覺也

陳存熙

逢辰

有相見歡詠淚云月痕未到朱扉送郎時

暗裏一汪兒淚沒人知搵不住收不聚被風吹吹作一

天愁雨損花枝其風情之綿密字句之自然可稱絕唱
然亦從李後主賦愁之翦不斷理還亂是離愁別是一
般滋味在心頭脫化出來者

孫花翁

惟信

字季蕃在江湖頗有標致多見前輩多聞

舊事善雅談長短句尤工有花翁詞一卷夜合花閨情
云風葉敲窗露蛩吟螯謝娘庭院秋宵又云斷魂留夢
煙迷楚驛月冷藍橋又云羅衫暗摺蘭痕粉跡都銷又
云幾時重憑玉驄過處小裊輕招又燭影搖紅詠牡丹
云對花臨景爲景牽情因花感舊又云絮飛春盡天遠

書沈日長人瘦又南鄉子感舊云霜冷欄杆天似水揚
州薄倖聲名總是愁又云一夢覺來三十載風流空對
梅花白了頭詞之情味纏綿筆力幽秀讀之令人涵泳
不盡案劉後村孫花翁墓誌云季蕃貫開封曾祖昇祖
可父頰武爵季蕃少受祖澤調監當不樂棄去始婚於
婺後去婺游留蘇杭最久一榻之外無長物躬爨而食
書無乞米之帖文無逐貧之賦終其身如此名重江浙
公卿閒聞花翁至爭倒屣所談非山水風月一不挂口
長身縕袍意度疏曠見者疑爲俠客異人其倚聲度曲

公瑾之妙散髮橫笛野王之逸奮袂起舞越石之壯

延祐四明志載宋梅麓樓公扶登招寶山沁園春云開
闢以來便有斯山獨當怒濤止秋空萬里寒催雁信塵
寰一簇輕算鴻毛小可詩情尋常酒量到此應須分外
豪難爲水笑平生未有者番登高飄飄身踏金鰲歎終
日風波無限勞看檣烏縹緲帆歸遠浦塵魚雜沓網帶
餘潮待約詩人相將月夜取次攜杯持螯乘槎意問
誰人領解空立亭皋詞鐫崖石今不存案景定建康志
云樓扶端平中沿江制置司幹官泰州志云淳祐閒知

泰州軍事周草窗輯絕妙好詞選樓扶次清真梨花韻
水龍吟一闕云輕腮暈玉柔肌籠粉緇塵斂避霽雪留
香曉雲同夢昭陽宮閉又云愁對黃昏恨催寒食滿襟
離思想千紅過盡一枝獨冷把梅花比樓扶字叔茂號
梅麓鄞人善文章四明靈應廟記梅麓所作尤工樂府
惜不多見

潘漁莊

希白

字懷古永嘉人寶祐中登第幹辦臨安府

節制司公事工長短句其九日大有一解云戲馬臺前
採花籬下問歲華還是重九恰歸來南山翠色依舊簾